

周岁部汇考

颜氏家训

风操篇

江南风俗儿生一期为制新衣盥浴装饰男则用弓矢纸笔女则刀尺针缕并加饮食之物及珍宝服玩置之儿前观其发意所取以验贪廉愚智名之为试儿亲表聚集致燕享焉自兹已后二亲若在每至此日常有酒食之事耳

周岁部纪事

晋书桓温传温字元子宣城太守彝之子也生未期而太原温峤见之曰此儿有奇骨可试使啼及闻其声曰真英物也彝以峤所赏故遂名之曰温

零陵先贤传郑产零陵人为白土乡嗇夫时民家产子一岁辄出口钱以故贫家鲜有举子者产劝百姓勿杀子口钱皆为代出郡县具以闻上钱因得免改白土曰更生乡

录异记道士口法遵居庐山简寂观道行精确独力检校以历数年全无徒弟忽梦元中法师谓之曰汝无人甚见勤劳今有童子所恨年小耳既觉话之于众出山过民王家有孩子年纔一晬见法遵至来抱其足不肯舍去法遵去后昼夜啼号累日不息法遵至则欣然迎之其父母曰三五年后即舍为童子果符元中梦授之语

宋史曹彬传彬字国华真定灵寿人父芸成德军节度都知兵马使彬始生周岁父母以百玩之具罗于席观其所取彬左手持干戈右手持俎豆斯须取一印他无所视人皆异之

金史王庭筠传庭筠字子端河东人生未期视书识十七字

海槎余录黎俗男女周岁即文其身白云不然则上世祖宗不认其为子孙也身穿花厚布衣露腿赤足头戴漆帽傍赘尺许雉尾二茎披肩颌阔可耻也男子家富者两耳复赘盞口大银圈十数为富